

MOCIÓN SOBRE A POSTA EN VALOR E DINAMIZACIÓN DO ARQUIVO MUNICIPAL.

PLENO 25 DE MAIO 2017. ACTA 06/2017

ANTECEDENTES:

Moción de AER do día 20/04/2017 con número 5.819 que se transcribe a continuación:

“O Concello de Redondela conta dende hai anos co correspondente arquivo municipal que desenvolve unha importante labor de custodia, clasificación, dixitalización e mantemento da diversa documentación que historicamente xerou, xestionou ou recibiu a administración local. O que fora Concelleiro de Cultura, Julio Alonso, creou no ano 2015 o Arquivo Audiovisual de Redondela, unha iniciativa interesante que reforzaba o potencial do propio Arquivo Municipal. O obxectivo principal deste proxecto é a recompilación, conservación e difusión da memoria e historia de Redondela a través do pasado fotográfico redondelán, carteis, documentos e produtos audiovisuais, principalmente en mans privadas e que se atopan en perigo de desaparición e que é fundamental a súa recollida e difusión.

Actualmente cóntase cunha única funcionaria dedicada ás tarefas de xestionar e manter o Arquivo Municipal e o Arquivo Audiovisual, o que coa cantidade de traballo existente, o persoal é claramente insuficiente para tal tarefa. Cabe engadir que esta traballadora e unha Auxiliar, pero como ven sendo máis que habitual, incorrecto e incluso a veces abusivo no noso Concello, ante a falta de persoal neste departamento, realiza as súas labores de auxiliar pero tamén de subalterno, de administrativo, de técnico medio e en ocasións máis aínda, de técnico superior de Arquivos. Para solucionar esta circunstancia precisamos altura de miras político e sobre todo interese pola potenciación do noso Arquivo Municipal. Por iso presentase a presente moción, para poñer en solfa tal necesidade e que o goberno local aproveite a oportunidade.

O potencial do Arquivo Municipal podería dar lugar a numerosos proxectos de interese para toda a veciñanza actual e futura, polo que supón a conservación da memoria histórica de Redondela. Para solucionar esta circunstancia precisamos visión política e afán por aproveitar o potencial do Arquivo Municipal para optimizar a información coa que conta dando lugar a proxectos novidosos con valor engadido histórico.

Tendo en conta que a Lei 7/2014 de Arquivos e documentos de Galicia, nos seus artigos:

art 14. 3. Son obrigas do persoal ao servizo dos arquivos públicos, de acordo coas responsabilidades profesionais que en todo caso lle corresponden a cada grupo ou categoría: g) Difundir, se é o caso, os documentos que custodien a través de actividades de divulgación e de formación.

art 44. 2. As entidades locais territoriais (...) En todo caso, están obrigadas a aplicar normas e procedementos que garantan o tratamento axeitado en canto á (...) difusión dos documentos xerados ou recibidos no exercicio das súas funcións.

Así pois, a difusión actual realízase a través dunha páxina de facebook e máis dun blog propios do Arquivo Municipal e do Arquivo Audiovisual, sendo o sensato que na páxina web do concello se lle dese a correspondente relevancia a este departamento cun apartado propio que permita a relación directa coa veciñanza neste eido. Outras posibilidades de difusión, de baixo custe de realización, poderían pasar por;

- Proxección escolar do Arquivo.
- Publicidade específica.
- Charlas por tódalas parroquias para dar a coñecer o arquivo e para convidar á veciñanza a aportar documentación histórica de valor.
- Xornadas de portas abertas.
- Exposicións con documentos e información propia do Arquivo Municipal e do Arquivo Audiovisual.
- Publicacións a partir da información histórica do Arquivo.
- Colaboracións con entidades culturais que traballen coa memoria histórica.

Por estes motivos, propoñemos os seguintes ACORDOS:

1.- Que de xeito inmediato se tomen as oportunas decisións para a potenciación, difusión e posta en valor do Arquivo Municipal.

2.- Que se reforce o persoal do Arquivo Municipal, aplicando a fórmula máis propicia e factible; creación doutro posto de traballo para o departamento, reforzando con persoal proveniente de bolsas ou contratos da Deputación provincial ou mesmo solicitando á Deputación un reforzo específico temporal, servizo que esta institución ofrece aos concellos que llo soliciten.

2.- Que dentro da nova páxina web do Concello de Redondela se deseñe un espazo específico para o Arquivo Municipal de tal xeito que a veciñanza poida comunicarse de xeito efectivo con este departamento. Que ademais se difunda a través destes medio os recursos dixitalizados dos que dispón tales como documentos históricos, planos antigos, fotografías, videos, etc e se promova a nivel escolar, charlas, xornadas, publicacións ou mesmo exposicións.”

VOTACIÓN E ACORDO.-

Instada a votación da moción anteriormente transcrita, apróbase por maioría dos/as concelleiros/as, sendo 12 votos a favor (6 do PsdeG-PSOE, 4 de AER, 1 do BNG e 1 da concelleira non adscrita) e 9 abstencións do PP.